

**Gasteizen, 1995eko azaroaren 24an
Ageriko batzarra**

Haritschelhar, J., euskaltzainburua
Lekuona, J.M., euskaltzainburuordea
Knörr, E., idazkaria
Arana, J.A., diruzaina
Altuna, P.
Azkarate, M.
Charriton, P.
Davant, J.L.
Goenaga, P.
Irigoyen, A.
Kintana, X.
Krutwig, F.
Larre, E.
Oihartzabal, B.
Ondarra, P.
Peillen, Tx.
Salaburu, P.
Sarasola, I.
Saturstegi, J.M.
Villasante, L.

Aduriz, J.A.
Aranburu, X.
Arbelbide, X.
Atxaga, M.
Eguzkitza, A.
Lakarra, J.A.
Larrarte, J.M.
Lasarte, M.P.
Lizundia, J.L.
Rotaetxe, K.
Urrestarazu, M.M.
Sancristoval, P.
Uribarren, P.
Zearreta, J.J.

Arabako Foru Diputazioaren jauregian, Batzar Nagusien aretoan, 1995eko azaroaren 24an, arratsaldeko 5etan, bildu da Euskaltzaindia. Alboko zerrendan aipatzen diren euskaltzain oso eta urgazleak etorri dira. Egungo bi batzarretarako bere ezin etorria adierazi du X. Diharce jaunak.

P. Goenagaren sarrera zen ageriko batzarren zioa. Mahaian jarri dira F. Ormazabal Arabako diputatu nagusia; J.M. Lopez de Juan Abad Batzar Nagusietako burua; J. Haritschelhar euskaltzainburua eta E. Knörr idazkaria. Aurreko tokietan ziren jaun-andere hauek: M. Karmen Garmendia Eusko Jaurlaritzako Kultura sailburua; X. Markiegi arartekoa; Mikel Mintegi, Arabako Kultura foru diputatua; J. Maria Zeberio Hizkuntza Politikarako sailburuordea; Juan Jose Goirienea Euskal Herriko Unibertsitateko errektorea, eta Alberto Lopez Basaguren, Unibertsitate bereko idazkari nagusia. Aretoa jendez beterik zegoen. P. Goenaga euskaltzain senide eta adiskideez gain euskaltzale ugari etorri dira ageriko batzar honetara, hainbeste non batzuek zutik egon behar izan baitute.

Euskaltzainburuak egin ditu lehenbiziko hitzak, Akademiaren eginkizunaz eta egungo ekitaldiaren esanahiaz. Ondoren, P. Altuna eta X. Kintana euskaltzain berriaren bila joan dira. Txalo beroaren artean sartu da Goenaga jauna aretoan, eta "Euskararen batasunaz eta duintasunaz" izeneko bere hitzaldia irakurri du.

Ohiturari jarraiki, lehen partean Antonio M. Labaienen bizitza eta lanak izan ditu hizlariak mintzagai, eta bereziki Tolosako idazleak batasunaz zituen iritziak. *Batasuna. Mala letra y peor espíritu de una pseudo unificación* (1972) eta *Alternativas para una factible unificación y desarrollo del euskera* (1984) liburuek erakusten dituzten ikusmolde arras desberdinak aztertu ditu Goenaga jaunak lehen atal honetan. Bigarrena euskararen egoerari, irakaskuntzan, batez ere, eskaini dio: onarpena, erabilpena eta kalitatea izan dira bigarren parte honen ardatzak.

Hurrena, euskaltzain berriaren biografia eta lanak azaldu ditu bere erantzunean Miren Azkarate andereak. Lanerako beti prest izatea eta batzordeetako haren ekarria nabarmendu ditu. Ondoren, euskara batuaren egungo premia nagusiak zerrendatu ditu: *euskara gordina* deitu izan dena saihestea, hizkuntza mailak bereiztea eta hiztegi batua osatzea, oroz gain.

Gero, Jean Haritschelharrek euskaltzain domina eta diploma eman dizkio P. Goenagari, eta euskaltzainkide guztiak iragan dira Euskaltzaindian sartu berria besarkatzeko.

Araba koruak eskaini du, Sabin Salaberriren zuzendaritzapean, kantaldi eder laburra, F. Ormazabal jaunaren amaiera hitzak baino lehen.

Jean Haritschelhar,
euskaltzainburua

Endrike Knörr,
idazkaria